

平濠記

明

錢德洪緒山輯

初贛州在官吏書門阜及在門軍民陰陽占卜皆與賊
通日在官府左右詞覘不待言出于口凡意向顏色之
間賊必先知之公知其然在此則示以彼在彼則示以
此每令陰陽擇日日者占卜或已吉而不用或欲用而
中止每勵兵蓐食令俟期而發兵竟不出其後一出而
成功

公至豐城聞濠變亟欲遯流趨吉安舟人聞宸濠發于

餘人來刼公畏不敢發以逆流無風爲辭公密禱于舟中無何北風大作舟人猶不肯行拔劍馘其耳遂發薄暮度勢不可前潛覓漁舟以微服行畱麾下一人服已冠服在舟中濠兵果犯舟而公不在欲殺其代者一人曰何益遂捨之故追不及是夜至臨江知府戴德孺喜甚畱公入城調度公曰臨江居大江之濱與省城相近且當道路之衝莫若吉安爲宜又以三策籌之曰濠若出上策直趨京師出其不意宗社危矣若出中策則趨南都大江南北亦被其害若出下策但據江西省城勤

王之事尙易爲也行至中途恐其速出乃爲間諜假奉朝廷密旨先知甯府將反行令兩廣湖襄都御史楊旦秦金及兩京兵部各命將出師暗伏要害以俟襲殺復取優人數輩各與百金以全其家令至伏兵處所飛報竊發日期將公文各縫置袷衣絮中將發閒又捕捉僞太師李士實家族至舟尾令其覘知公卽佯怒牽之上岸處斬已而故縱之令其奔報宸濠邏獲優人果于袷衣絮中搜得公文遂疑不發逾數日公調度已定乃移傲遠近暴濠罪惡始悟爲公所欺

公既拔南昌知濠兵將還救遣伍文定邢珣徐璉戴德
儒共領精兵五百分道迎擊出其不意濠亦先使精兵
千餘人從間道欲出公不意攻復省城偶遇于某處我
兵失利報至公怒甚欲以軍法斬文定等自帥兵親戰
或以敵鋒方交若即斬之兵無統領俟各奮勵以圖後
效明日各帥兵奮死以戰大敗之

此事年譜不載以爲先生失計也何所失不料濠亦
取間道出奇兵也然能不以小衄挫氣反因而激勵
其麾下轉敗爲功則是即短見長而可以垂法于行

師矣

江彬等初至公往見彬輩皆設席于傍令公坐公佯爲
不知遂坐上席轉傍席于下以坐彬輩彬輩銜之出語
誚公公以常行交際禮諭之左右皆爲公解遂無言公
非爭一坐也恐一受節制則事機皆將聽彼而不可爲
矣

公見張永與之語知其忠以濠付之復上捷音以爲宸
濠不軌之謀已逾一紀旬月就俘皆欽差總督威德指
示方略所致以此歸功總督軍門以止上江西之行稱

病淨慈寺永在上前備言公盡心爲國及彬等欲加害
意既而公赴召奔龍江關忠等又阻之使不見公乃以
綸巾草服入九華山永聞又力言于上曰王守仁實忠
臣今聞眾欲爭功欲并棄其官入山修道絲是上益信
公黃綰記

此條載年譜中然歸功總督則止駕中倫綸巾野服
則舉止中慮故永得因以進言而解上疑此譜所未
及詳也併著之

公於豐城聞變時參謀雷濟蕭禹在侍相與計議恐宸

濠徑襲南京遂犯北京欲使遲留半月遠近聞知自然
有備無患乃假寫兩廣都御史楊火牌云爲機密軍務
事准兵部及都察院右副都御史顏咨俱爲前事本院
帶領狼達官兵四十八萬齊往江西公幹的于五月初
三日在廣州府起馬仰沿途軍衛有司照數預備糧草
伺候支應若臨期缺悞定依軍法斬首意示朝廷先差
顏等勘事已密于兩廣各處提調兵馬潛來襲取宸濠
將發閒雷濟問曰甯王見此恐未必信曰不可信可疑
否對曰疑則不免公笑曰得渠一疑彼事去矣既而歎

曰宸濠素行無道殘害百姓今日雖從達者眾必非本心徒以威劫利誘苟合一時耳縱之前去我以問罪之帥徐躡其後順逆既判勝負預可知也但賊兵早越一方民命殘一方民命虎兕出柙收之遂難爲今之計只是遲留宸濠一日不出則天下實受一日之福遂密遣乖覺人役持火牌設法打入省城濠果疑懼十八日回至吉安又令濟等假寫南雄南安贛州等府報帖日逐飛報府城打八省下一以動搖省城人心一以鼓勵吉安致義之士又與濟等謀假寫迎接京軍文書云提督

軍務都御史王爲機密軍務事準兵部咨本部題奉聖旨許泰邵永分領邊軍四萬從鳳陽等處陸路徑撲南昌劉暉桂勇分領京邊官軍四萬從徐州淮安等處水陸並進分襲南昌王守仁領兵二萬楊旦等領軍八萬奉金等領兵六萬各從信地分道並進刻期夾攻南昌毋得彼先此後本職先往福建公幹因遇甯王之變見已退住吉安府起兵今遵前敕候兩廣兵齊依期前進外看得兵部咨到緣繇皆是先發制人之謀當時必以甯王兵未舉動令其兵已出約亦有二三十萬若北來

官兵不知的信有悞事機以本職計之若甯王堅守南昌擁兵不出官軍遠來天時地利兩皆不便恐難猝圖須按兵徐行或分兵先守南都候其已離江西然後或遮其前或擊其後使之首尾不救破之必矣今甯王主謀李士實劉養正等各有書密寄本職賊將凌十一閔廿四亦各密差心腹前來遞狀皆要立功報効可見甯王已是眾叛親離之人敗必不久今聞兩廣共起兵四十八萬其先鋒八萬已到贛州湖廣起兵二十萬其先鋒六萬已到黃州本職起兵十萬先領二萬屯吉安府

各府知府等官各起兵快約亦不下一萬共計見有十一二萬盡已足用但得甯王早離江西必有內變因而乘機夾攻爲力甚易爲此備開緣由煩請酌定一應進止機宜選乖覺曉事人員同差去人役星夜回報寫成手本令濟等選慣能走遞家人重與盤費以前事機陽作實情備細密切說與令渠潛蹤隱跡星夜前往南京及淮楊迎接官兵又令濟等尋訪素通宸濠之人厚加結納令密報甯府宸濠聞知大加賞賜差人四路跟捉果獲手本將差人拷問詳悉當時殺死因此又疑劉李

不信其謀又與龍光計議假寫回報士實書云承手教足見老先生報國本心始知近日之事迫于不得已身雖陷于網羅乃心固不在王室也所諭密謀非老先生斷不能及此又得子吉同心協力當萬無一失矣然幾事不密則害成務須待機而發不然恐無益于國而徒爲老先生與子吉之累又區區心所不忍也况今兵勢四路已合只待此公一出便可下手昨凌閔諸將遣人密傳消息亦皆出于老先生與子吉開導激發而然但恐此三四人皆是粗漢易有漏泄須戒令慎密又曲爲

之防可也目畢卽付丙丁知名不具與養正亦同兩書既就遣雷濟設法差遞士實龍光設法差遞養正各差遞人皆被宸濠殺死宸濠繇是愈疑劉李劉李亦各相疑不肯出身任事又遣素與養正交厚指揮高睿致書養正及遣濟禹引誘內官萬銳等私寫書信與內官陳賢等皆反閒之謀又多寫告示及招降旗號開諭逆順禍福及寫木牌等項動以千計遣雷濟龍光蕭禹王佐等分行賊壘潛將告示粘貼及旗號木牌四路標插又先張疑兵於豐城示以欲攻之勢又將養正家屬在吉

信家人今議者并將在冊功次削去恐繼此有變人皆以光等爲鑑戒矣龍光說

按先生有言孔子修春秋于凡陰謀詭計之事皆削之以杜奸故平藩用閒不彫于奏不宣于語門弟子皆不聞亦斯意焉然不著其顛尾後世將不知反掌取濠之故雖有忠誠體國之士或臨事而易視惟觀其成功者如是則一切謀計皆所以濟其忠誠在他入爲陰詭者在先生爲變化隨時而有以發體國之智慧雖存之以杜奸未爲不合也

公應變如神不可測識方破省城時忽傳令造免死木牌數十萬莫知所用及發兵迎擊濠于湖上取木牌順流放下時賊兵聞省城已破脅從之眾欲竄無路見水浮木牌一時爭取散去不計其數翼日伍文定等方督兵殊死戰賊兵忽見一大牌書甯王已擒我軍毋得縱殺一時驚擾遂大潰濠兵旣屢敗窮促思潛避見一漁船隱蘆葦中濠大聲叫渡漁人移棹請渡竟送軍中諸將尙未知也

漁人縛送與捷疏所載頗殊蓋濠泣別妃嬪之後避

就漁舟則知縣王冕所轉使耳疏中不便詳述與不載反閒諸謀同意又蔡文述贛州父老言濠爲葉芳所擒當時芳出濠不意之故濠窮而思遜雖王冕預備漁舟伺候縛送實芳促之之力也

公在豐城聞變南風正急拜天哭告風稍定頃之舟人謹謀回風濟禹取香烟試之舟上果然久之北風大作濠追兵將及夫人公子在舟公呼一小漁船自縛敕令濟禹持米二斗鱖魚五寸與夫人爲別將發問濟曰行備否濟禹對曰已備夫子笑曰還少一物濟禹思之不

得夫子命取羅蓋曰到地方無此何以信明日至吉安城下城門方戒嚴舟不得泊岸濟禹揭羅蓋以示城中遂謹慶曰王爺爺還矣乃開門羅拜迎入於是濟禹心嘆危迫之時暇裕乃如此

雷濟說

甯藩一事讒先生者有二曰始通甯府後知事不可成從而剪之又曰甯府財寶山積兵入其宮悉取以歸當時至形諸章奏有識皆知其必無而莫悉其無之故皆知其絕無可疑而無以破人之疑余移官入贛當時故老尚有存者咨訪累月乃知先生計慮之深規模之遠

有非常情所能測也逆藩當時所憚獨先生耳殺之不得必欲致之故致惓惓于先生而先生亦示以不絕機有所待也峒酋葉芳有眾萬人感不殺之恩樂爲先生用先生閒示以意芳叩首踊躍待報而發逆藩亦屬意于芳嘗以厚貲啗芳芳不卻有以聞于先生者先生憮然久之搏案起曰今日視義當爲成敗禍福不計也及起兵芳密使人告曰吾以款彼也今日之事生死惟命先生大喜卽攜以往鄱湖之戰逆藩望芳來芳乘之遂就擒大難之平芳實有力先生語芳曰吾請于朝以官

償汝如何芳叩首曰芳土人不樂拘束願作富家翁耳先生遂入宮籍所有以獻餘以予芳滿其欲焉

蔡文記

文非先生門下士不惟信先生之心兼欲使天下皆自先生之迹又欲使後世識制叛之機用夷之妙文亦有心人哉

德洪昔在師門或問用兵有術否夫子曰用兵何術但學問純篤養得此心不動乃術耳凡人智能相去不甚遠勝負之決不待卜諸臨陣只在此心動與不動之閒昔與甯王逆戰于湖上南風轉急而命某某

爲火攻具是時前軍正挫卻某某對立矍視三四申告耳如弗聞此輩皆有大名于時平日智術豈有不足臨事忙失若此智術將安所施又嘗聞鄒謙之曰昔先生與甯王交戰時與二三同志坐中軍講學謀者走報前軍失利坐中皆有怖色先生出見謀者退而就坐復接緒言神色自若頃之謀者走報賊兵大潰坐中皆有喜色先生出見謀者退而就坐復接緒言神色亦自若又嘗聞陳惟謀述薛尚謙之言曰昔見有待于先生者自稱可與行師先生問之對曰某

能不動心曰不動心可易言耶對曰某得制動之方先生笑曰此心當對敵時且要制動又誰與發謀出慮又問今人有不知學問者盡能履險不懼是亦可與行師否先生曰人性氣剛者亦能履險不懼但其心必待強持而後能卽強持便是本體之蔽便不能宰割庶事孟施舍所謂守氣也若人真肯在良知上用功時時精明不蔽于欲自能臨事不動不動真體自能應變無窮此曾子所謂守約也又嘗聞劉邦采曰昔有問人能養得此心不動卽可與行師否先生

曰也須學過此是對刀殺人事豈意想可得必須身
習其事斯節制漸明智慧漸周方可信行天下未有
不履其事而能造其理者孔子自謂軍旅之事未之
學亦非謙言但聖人得位行志自有消變朱形之道
不須用此後世論治根源上全不講及每事只在中
中截作起故犯手脚若在根源上講求豈有必事殺
人而後可以安人之理某自征贛以來朝廷使我日
以殺人爲事心豈割忍但事勢至此譬既病之人且
須治其外邪方可扶回元氣病後施藥猶勝立視其

死故耳可平生精神俱用在此等沒緊要事上昔者
德洪事先生八年在侍同門每有問兵事者皆默而
不答以故南贛甯藩始末俱不與聞先生沒後搜錄
遺書七年而奏疏文移始集及查對月日而後五征
始末具見獨于用閒一事昔嘗槩聞奏疏文移俱無
所見去年面訪龍光始獲閒書閒牌書彙并所聞于
諸同門者悉彙而錄焉

學海類編

三

卷



國家圖書館, NATIONAL CENTRAL LIBRARY, TAIWAN, R.O.C.